

存存齋醫
譜

方琦
署檢

版片
藏
興裘氏
紹

重刻存存齋醫話稿序

唐王勃撰醫話序一卷。卽醫話之鼻祖也。宋張杲著醫說
十卷。明俞弁著續醫說十卷。卽醫話之導師也。迨前清
者。如林史典著願體醫話。黃凱鈞著友漁齋醫話。王士雄
編柳洲醫話。著潛齋醫話。毛祥麟著對山醫話。陸以湑著
冷廬醫話。計楠著客塵醫話。柳寶詒著惜餘醫話。丁福保
著醫話叢存。先祖秀山公纂古醫格言。皆本各個人之閱
歷。或話所聞。或話所見。或話所心得。或轉述師友之見聞。
或指摘醫家之利弊。或憲章先聖之名言。雖各話當年陳

跡而言多精鑿較之瀏覽醫書尤有趣味且足長見識而
益智慧昔老名醫趙晴初先生得醫中三昧年七十餘猶
著書不倦親自手錄作蠅頭行楷在中年時最喜訪道
江與凌嘉六先生交相善江蘇與馬培之先生誼尤深曾
爲之跋紀恩錄晚年在紹與余爲亡年交頗莫逆與之談
醫知無不言言無不盡夜雖深無倦意嘗謂余曰醫非博
不能通非通不能精非精不能專必精而專始能由博而
約吾紹前輩金士峨陳念義以景岳全書爲枕中秘任瀨
波案頭只一冊臨證指南俞根初案上只一冊仲景傷寒

論可見心得處不在多也。然無心得者，不得以此籍口，欲求心得，正非多讀古今醫書不可。蓋不博亦斷不能約也。其言如此，可謂醫林佳話矣。與余會診時，亦不尠見其臨診辦證，反覆推詳，選藥製方，心思周到，往往一味佐藥，亦費幾許時刻，思想而得，一得卽全方靈透，歷驗如神。嘗著奇偶方選，約千餘方，方解亦甚簡明，醫案一冊，斷證確切，方案明通，皆足爲後學師範。惜無刊本，卽存存齋醫話稿五集，祇有初二兩集。由孫瀛階陳晝卿兩先生爲之序。姚靜安先生代爲刊行，不久其版散失。迄於今，各書肆已無

從購覓本地如此他省可知同社友裘君吉生恐其書湮
沒不傳偏覓原版雖幸而購到已缺多頁亟亟然爲之重
刻付印茲於其將出板焉囑余略叙其巔末於簡端斯亦
裘君表彰前哲之苦心也夫

中華民國四年十一月望日何廉臣印巖識於蠡城卧龍
山麓之宣化坊



北京中醫藥大學圖書館版權所有

序

余老友趙君晴初生平手不釋卷尤邃於軒岐之學初不以醫自名命劑輒效有不可爲者顧能早決之以是四方求治者接踵無虛日君猶慮耳目之隘也虛心訪道不憚涉歷孜孜焉汲汲焉蓋靡刻不留意於活人濟世余懵不知醫而樂與君遊嘗聆其緒論闡發義理剴陳利弊足以拓醫家之胸臆釋病者之迷罔非鑽研深閱歷久不克臻是每舉其所話以話於朋輩中之從事於醫及見困於病者惟恐其傳之不能徧也又恐君之苦酬應不遑燕居而

未嘗筆之於書也。一日見示是編，受而讀之，則其活人濟世之懷，具藹然流露於楮墨間，而知向之因其所語以規其平日之鑽研閱歷者，猶祇十一二焉。今年秋，其友姚靜盦廣文請付剞劂以行世，余亟慫慂之，爰不自揣譾陋，爲綴數語於簡端，且曩者欲徧布其話而不可得，而今乃得家置一編焉，并以志余之喜也。光緒辛巳冬月同邑孫垓

存存齋醫話藁卷一

會稽趙彥暉晴初

門人

魯紹澧東川

同校

賀錫祥吉人



一醫話不知始於何人殆濫觴於詩話而有是目余所見者願體醫話友漁齋醫話柳洲醫話潛齋醫話凡四種願體醫話中多載良方惟前列醫話十二則故一名願體醫話良方友漁齋醫話則分一覽延齡橘旁雜論上池涓滴肘後偶鈔證治指南藥籠小品爲六種柳洲醫話乃王孟

英輯魏柳洲玉橫續名醫類按中按語單方爲柳洲醫話
故一名柳洲醫話良方潛齋醫話則錄簡效方於前載
話於後故一名潛齋簡效方同一醫話其體例不同存如
是余自巳冠後喜讀醫書有所見聞隨手識之間附以心
得以備他日之參攷然已遺失者多矣戊寅秋杜門養病
因檢舊笥得若干條命兒子錄出成帙重爲芟潤之標其
自爲醫話藁蓋話所見話所聞并話所得拉雜不分門類
亦全無體例也稱藁者明非定本也條首編以數目字者
欲教我者有可專指且前條於理有誤後條可救正於義

未盡可重申、有意同者可參合、有引證者可披尋、所以清眉目也、引用書有購求數年而始得、有輾轉借閱者、內有世少傳本之書、均記作者姓氏年世、思存古書之名目也、先得二卷、友人姚靜盦廣文見而矐之、以爲可以問世、囑乃弟秋巖付諸手民、余固辭不獲、惟有道君子指其謬疵而進以高深、則幸甚。

〔二〕頗體醫話曰、今創一議、無論內外大小、一年之中、豈無一二奇證、若懷之胸臆、則近於秘道不傳、若登之棗梨、又礙於少難成帙、何不於三五知己中、每於歲底、各出所治

奇病觀何證服何藥如何療如何愈其成一卷以爲醫按
多年增廣亦是不朽之舉庶使後人有跡可循而無
不真之憾矣功不在盧扁下也然近日又有一種時
遇疾病危險諸醫會集其中學術平常者不過輕描淡寫
而識見高明者若欲另立意見惟恐招人妒忌萬一不效
又慮損名瞻前顧後亦是大同小異了事殊不知上天賦
我聰明才智若臨證之際不費一番思索不用一番心血
代天宣化救濟蒼生祇於此中求富貴顧聲名以他人性
命痛癢無關生死聽天清夜思之能無自愧按願體醫話

一卷揚州史檮臣典所著皆時醫藥石之言多急救生
之法孳孳爲善可謂無微不至陳文恭公謂史君飽讀
故曲體人情其言質直而透切智愚易曉偶錄二則藹
仁者之言切中時弊之論窺見一斑矣

三柯韻伯先生氣上騰便是水一語最足玩味蓋陽氣凝
結津液不得上升以致枯燥治宜溫熱助陽俾陰精上交
陽位如釜底加薪釜中之氣水上騰而潤澤有立至者仲
聖以八味腎氣丸治消渴亦此義以肺爲五臟六腑之華
蓋下有暖氣上蒸卽潤而不渴若下虛極則陽氣不能升

故肺乾而渴譬如釜中有水以板蓋之下有火力煖氣上騰而板能潤無火力則水氣不能上板終不可得而潤也然枯燥由於陰竭者則是泉源既竭必須大劑濡養頻服如救焚然始克有濟同一枯燥證有陰凝陰竭之分二證霄壤懸殊萬一誤投死生立判不可不細審也

〔四〕痰屬濕爲津液所化蓋行則爲液聚則爲痰流則爲津止則爲涎其所以流行聚止者皆氣爲之也龐安常有言人身無倒上之痰天下無逆流之水故善治痰者不治痰而治氣氣順則一身之津液亦隨氣而順矣余謂不治痰

而治氣一語爲治痰妙諦。蓋痰之患由於液不化。液之結由於氣不化。氣之爲病不一。故痰之爲病亦不一。必求其所因之氣而後可治其所結之痰。醫昌緒餘曰：治痰當求其源。倘以二陳統治諸痰，因於濕者固宜，使無濕則何以當之？如因於火則當治火。火降金清，秋令迺行，水無壅遏，痰安從生？丹谿朱氏曰：黃芩治痰，假其下火，正謂此也。餘可類推。

〔五〕河間劉氏曰：腸胃鬱結，穀氣內發而不能宣通於腸胃之外，故善噫而或下氣也。余謂噫與下氣，卽屬宣通，所以

肝胃病往往得噫與下氣稍瘥也。雖不能宣通於腸胃之外而猶得宣通於腸胃之上下也。

〔六〕大黃同附桂用是溫下法。葉氏醫按痢門。姚頤真用大劑肉苁蓉配薑附是即溫下法。化爲溫滑法。瀉心湯薑連並用是苦辛開降法。馬元儀印機草中乾薑同枳實用是即苦辛開降法。化爲辛潤開解法。枳實潤燥開結蕩熱滌痰爲胸膈熱鬱之聖藥。其性濡潤謂之滑腸則可。若代大黃作下藥用則不可。吾鄉章虛谷有薑仁辨言之甚詳。

〔七〕余治一暑濕證已熱退神清胃動進食矣忽急束邀診。

仍發熱神昏、更加氣喘、細詢因喫粥油三四盞、遂致此、余
力辭、病竟不起、閱本草綱目拾遺、言粥油能實毛竅、滋陰
之功勝熟地、暑濕初愈、服此安得不復發而增劇耶、又
了凡先生曰、煮粥飯中有厚汁、滾作一團者、此米之精液
食之最能補精、又紫林單方治精清不孕方、用粥油日日
取起、加煉過鹽少許、空心服下、其精自濃、

八人知息道從口鼻出入、不知徧身毛竅俱暗、隨呼吸之
氣以爲鼓伏、所以外感表實證、毛竅阻而氣機不能相引、
則發喘、內傷表虛證、汗多亡陽、毛竅開而氣機過泄、則息